

Die Sechs iss fort

Om letzde Mondaach habb ich de Schorsch unns Kättche in de Bohnhofstroof getroffen, unn weils Kättche in de Blummelade iss, hawwe mir zwaa Männer e bisje mettenonner geschwätzt. Uff oomol frächt mich de Schorsch: Du Honnes, wo du unn doi Fraa jetz sibbzich seid, hosde schunn ebbes defoo gemerkt?

Ich wusst nit wasser wollt unn habb gefroocht: Ei was soll ich dann gemerkt hawwe?

De Schorsch hott sich umgeguckt, awwer soi Fraa war noch im Geschäft unn so frächder nochemol: Hosde was gemerkt, so villeicht om Sunndaach moie?

Beim Friehstick? habb ich gefroocht, odder wo soll ich was gemerkt hawwe?

De Schorsch hott erum gedruckst: Odder bisde om Sunndaach moie frieh uffgestonne?

Om Sunndaach?, habb ich zur Antwort gewwe, ei ja, doo bin ich schunn um acht enaus gefahrn on de Felsekeller, habbs Audo hiegestellt unn binn om Joffche soiner Ränch vorbei bis in die Hochemer Wingert unn dort enunner bis zum Moo gelaafe – unn widder redur! Unn dann bin ich gleich in de Hersch zum Friehschoppe, dess waaßde awwer doch.

Weils Kättche immer noch nit außem Lade kumme iss, fängt de Schorsch schunn wider oo: No ja, dann villeicht om Somsdaach owend, odder?

Schorsch, habb ich gesacht, jetz longt merrs. Was willsden alls wisse ob ich was gemerkt hätt - was soll ich dann gemerkt hawwe? Eraus mett de Sprooch!

Ei, druckst de Schorsch erum, ich moon wenn merr koo neununnsechzich mehr iss doo iss der Sechs doch fort, odder?

Ich musst grinse: Awwer Schorsch – dess heeßt „die“ Sechs unn nit „der“ Sechs!

Ei ... ei so?, stottert de Schorsch, „die“ Sechs heeßt dess? Was iss mett die Sechs wenn merr aus de sechziger Johnn erauskimmt unn sibbzich werdd?

Ich habb mettem Kopp gewackelt: Ab doo isse bei dir unn de meisde in unserm Alder fort.

Ja, de Schorsch hott dief Luft gehollt, dann steht do enn Siwwener unn die Sechs iss fort! Awwer wennse ersdemol fort iss, was dann?

Ich habb gegrinst: Dess waaß ich doch nit.

Wieso waaßde dess nit? frächt de Schorsch, bei dir isse doch aach fort, odder?

In dem Aacheblick isses Kättche außem Lade kumme, hadd enn scheene Strauß Blumme in de Hond, hott awwer gleich widder oogefonge mettere jung Fraa ze schwätze, die grad in de Lade enoiwollt. Desshalb hadd ich noch vill Zeit dem Schorsch ze saache: Naa, bei mir isse immer noch doo, die Sechs.

Sprichbeitel! De Schorsch hott mich e bisje mitleidich oogeguckt: Wieso iss die Sechs bei dir noch doo? – unn bei mir unn de meisde isse, wie du sachst, ab emm Sibbzichsde fort?

Ich konnts Lache nimmi halle: Ei Schorsch, iwwerleech doch emol. Du warst doch de-letzt bei moine Fraa uffem Geburtsdaach. Unn wonn hottse Geburtsdaach?

Ei om Sechste, gibt de Schorsch zur Antwort.

Siehsde, habb ich gesacht.

Eiern Honnes